

四庫全書

集部

欽定四庫全書

集部

文編卷二十五

詳校官檢討臣德生

侍讀臣孫球覆勘

總校官進士臣楊懋珩

校對官編修臣汪鏞

謄錄監生臣任應銑

欽定四庫全書

文編卷二十五

明 唐順之 編

非十二子

荀子

假今之世飾邪說文奸言以梟亂天下商宇嵬瑣使天下混然不知是非治亂之所存者有人矣縱情性安恣睢禽獸之行不足以合文通治然而其持之有故其言之成理足以欺惑愚衆是它囂魏牟也忍情性綦谿利

跂苟以分異人為高不足以合大衆明大分然而其持之有故其言之成理足以欺惑愚衆是陳仲史鮑也不知一天下建國家之權稱上功用大儉約而慢差等曾不足以容辨異懸君臣然而其持之有故其言之成理足以欺惑愚衆是墨翟宋钘也尚法而無法下脩而好作上則取聽於上下則取從於俗終日言成文典及紂察之則倜然無所歸宿不可以經國定分然而其持之有故其言之成理足以欺惑愚衆是慎到田駢也不法

先王不是禮義而好治怪說玩琦辯甚察而不惠辯而無用多事而寡功不可以為治綱紀然而其持之有故其言之成理足以欺惑愚衆是惠施鄧析也畧法先王而不知其統猶然而材劇志大聞見雜博業往舊造說謂之五行甚僻遠而無類幽隱而無說閑約而無解案飾其辭而祇敬之曰此真先君子之言也子思唱之孟軻和之世俗之溝猶督儒囁囁然不知其所非也遂受而傳之以為仲尼子游為茲厚於後世是則子思孟軻

之罪也若夫總方畧齊言行一統類而羣天下之英傑
而告之以太古教之以至順與窪之間簾席之上歛然
聖王之文章具焉佛然平世之俗起焉六說者不能入
也十二子者不能親也無置錐之地而王公不能與之
爭名在一大夫之位則一君不能獨畜一國不能獨容
成名況乎諸侯莫不願以為臣是聖人之不得勢者也
仲尼子弓是也一天下財萬物養長生民兼利天下通
達之屬莫不服從六說者立息十二子者遷化則聖人

之得勢者舜禹是也今夫仁人將何務哉上則法舜禹
之制下則法仲尼子弓之義以務息十二子之說如是
則天下之害除仁人之事畢聖王之跡著矣

八奸

韓非子

凡人臣之所道成奸者有八術一曰在同牀何謂同牀
曰貴夫人愛孺子便僻好色此人主之所惑也託於燕
處之虞乘醉飽之時而求其所欲此必聽之術也為人
臣者內事之以金玉使惑其主此之謂同牀二曰在旁

何謂在旁曰優笑侏儒左右近習此人主未命而唯唯
未使而諾諾先意承旨觀貌而察色以先主心者也此
皆俱進俱退皆應皆對一辭同軌以移主心者也為人
臣者內事之以金玉玩好外為之行不法使之化其主
此之謂在旁三曰父兄何謂父兄曰側室公子人主之
所親愛也大臣廷吏人主之所與度計也此皆盡力畢
議人主之所必聽也為人臣者事公子側室以音聲子
女收大臣廷吏以辭言處約言事事成則益爵益祿以

勸其心使犯其主此之謂父兄四曰養殃何謂養殃曰人主樂美宮室臺池好飾子女狗馬以娛其心此人主之殃也為人臣者盡民力以美宮室臺池重賦歛以飾子女狗馬以娛其主而亂其心從其所欲而樹私利其間此謂養殃五曰民萌何謂民萌曰為人臣者散公財以說民人行小惠以取百姓使朝廷市井皆勸譽已以塞其主而成其所欲此之謂民萌六曰流行何謂流行曰人主者固壅其言談希於聽論議易移以辨說為人

臣者求諸侯之辯士養國中之能說者使之以語其私為巧文之言流行之辭示之以利懃懼之以患害施屬虛辭以壞其主此之謂流行七曰威強何謂威強曰君人者以羣臣百姓為威强者也羣臣百姓之所善則君善之非羣臣百姓之所善則君不善之為人臣者聚帶劍之客養必死之士以彰其威明為己者必利不為己者必死以恐其羣臣百姓而行其私此之謂威強八曰四方何謂四方曰君人者國小則事大國兵弱則畏強

兵大國之所索小國必聽強兵之所加弱兵必服為人臣者重賦歛盡府庫虛其國以事大國而用其威求誘其君甚者舉兵以聚邊境而制歛於內薄者數內大使以震其君使之恐懼此之謂四方凡此八者人臣之所以道成奸世主所以壅劫失其所有也

行軍

孫子

孫子曰凡處軍相敵絕山依谷視生處高戰隆無登此處山之軍也絕水必遠水客絕水而來勿迎之於水內

令半渡而擊之利欲戰者無附於水而迎客視生處高
無迎水流此處水上之軍也絕斥澤唯亟去無留若交
軍於斥澤之中必依水草而背衆樹此處斥澤之軍也
平陸處易右背高前死後生此處平陸之軍也凡此四
軍之利黃帝之所以勝四帝也凡軍好高而惡下貴陽
而賤陰養生處實軍無百疾是謂必勝丘陵隄防必處
其陽而右背之此兵之利地之助也上雨水沫至欲涉
者待其定也凡地有絕澗天井天牢天羅天陷天隙必

亟去之勿近也吾遠之敵近之吾迎之敵背之軍旁有
險阻潢井蒹葭林木蘚苔者必謹覆索之此伏奸之所
也近而靜者恃其險也遠而挑戰者欲人之進也其所
居易者利也衆樹動者來也衆草多障者疑也鳥起者
伏也獸駭者覆也塵高而銳者車來也卑而廣者徒來
也散而條達者樵採也少而往來者營軍也辭卑而益
備者進也辭強而進驅者退也輕車先出其側者陳也
無約而請和者謀也奔走而陳兵者期也半進半退者

誘也杖而立者飢也汲而先飲者渴也見利而不進者勞也鳥集者虛也夜呼者恐也軍擾者將不重也旌旗動者亂也吏怒者倦也殺馬肉食者軍無糧也懸瓶不返其舍者窮寇也諄諄翕翕徐與人言者失衆也數賞者窘也數罰者困也先暴而後畏其衆者不精之至也來委謝者欲休息也兵怒而相迎久而不合又不相去必謹察之兵非益多也雖無武進足以併力料敵取人而已夫唯無慮而易敵者必擒於人卒未親附而罰之

則不服不服則難用卒已親附而罰不行則不可用故令之以文齊之以武是謂必取令素行以教其民則民服令不素行以教其民則民不服令素行者與衆相得也

詭使 韓非子

聖人之所以為治道者三一曰利二曰威三曰名夫利者所以得民也威者所以行令也名者上下之所同道也非此三者雖有不急矣今利非無有也而民不化上

威非不存也而下不聽從官非無法也而治不當名三者非不存也而世一治一亂者何也夫上之所貴賞與其所以為治相反也夫立名號所以為尊也今有賤名輕實者世謂之高設爵位所以為賤貴基也而簡上不求見者世謂之賢威利所以行令也而無利輕威者世謂之重法令所以為治也而不從法令為私善者世謂之忠官爵所以勸民也而好名義不進仕者世謂之烈士刑罰所以擅威也而輕法不避刑戮死亡之罪者世謂

之勇夫民之急名也甚其求利也如此則士之飢餓之絕者焉得無巖居苦身以爭名於天下哉故世之所以不治者非下之罪上失其道也常貴其所以亂而賤其所以治是故下之所欲常與上之所以為治相詭也今下而聽其上上之所急也而惇慤純信用心壹者則謂之宴守法固聽令審則謂之愚敬上畏罪則謂之怯言時節行中適則謂之不肖無二心私學聽吏從教者則謂之陋難致謂之正難予謂之廉難禁謂之瘠有令不

聽從謂之勇無利於上謂之愿少欲寬惠行德謂之仁
重厚自尊謂之長者私學成羣謂之師徒閒靜安居謂
之有思損人遂利謂之疾險躁佻反覆謂之智先為人
而後自為類名號言汎愛天下謂之聖言大本稱而不
可用行而乖於世者謂之大人賤爵祿不撓上者謂之
傑下漸行如此入則亂民出則不便也上宜禁其欲滅
其迹而不止也又從而尊之是教下亂上以為治也凡
所治者刑罰也今有私行義者尊社稷之所以立者安

靜也而躁險讒諛者任四封之內所以聽從者信與德
也而陂知傾覆者使令之所以行威之所以立者恭儉
也不聽上而巖居非世者顯倉廩之所以實者耕農之
本務也而綦組錦繡刻書為示作者富名之所以成城
池之所以廣者戰士也今死戰之孤飢餓乞于道而優
笑酒徒之屬乘車衣絲賞祿所以盡民力易下死也今
戰勝攻取之士勞而賞不霑而卜筮視手理狐虫為順
辭於前者日賜上握手量所以擅生殺之柄也今守度

奉量之士欲以忠嬰上而不得見巧言利辭行奸軌以
倖偷世者數御據法直言名刑相當循繩墨誅奸人所
以為上治也而愈疏遠諂施順意從欲以危世者近習
悉租稅專民力所以備難充冤府也而士卒之逃事伏
匿附託有威之門以避徭賦而上不得者萬數夫陳善
田利宅所以戰士卒也而斷頭裂腹播骨乎平原曠野
者無宅容身身死田奪而女妹有色大臣左右無功者擇
宅而受擇田而食賞利一從上出所擅制下也而戰介之

士不得職而閒居之士尊顯上以此為教名安得無卑位安得無危夫卑名位者必下之不從法令有二心無私學反逆世者也而不禁其行不破其羣以散其黨又從而尊之用事者過矣上世之所以立廉恥者所以屬下也今士大夫不羞汙泥醜辱而宦女妹私義之門不待次而宦賞賜之所以為重也而戰鬪有功之士貧賤而便辟優徒紹級名號誠信所以通威也而主揜障近習女謁並行百官主爵遷人用事者過矣大臣官人與

下先謀比周不法行威利在下則主卑而大臣重矣立法令者以廢夫私也法令行而私道廢矣私者所以亂法也而士有二心私學巖居窺處託伏深慮大者非世細者惑下上不禁又從而尊之以名化之以實是無功而顯無勞而富也如此則士之有二心私學者焉得無深慮勉知詐與誹謗法令以求索與世相反者也凡亂上反世者常士有二心私學者也故本言曰所以治者法也所以亂者私也法立則莫得為私矣故曰道私者

亂道法者治上無其道則智者有私詞賢者有私意上有私惠下有私欲聖智成羣造言作辭以非法措於上上不禁塞又從而尊之是教下不聽上不從法也是以賢者顯名而居奸人賴賞而富賢者顯名而居奸人賴賞而富是以上不勝下也

說難

韓非子

凡說之難非我知之有以說之之難也又非吾辯之能明吾意之難也又非吾敢橫佚而能盡之難也凡說之

難在知所說之心可以吾說當之所說出於為名高者也而說之以厚利則見下節而遇卑賤必棄遠矣所說出於厚利者也而說之以名高則見無心而遠事情必不收矣所說陰為厚利而顯為名高者也而說之以名高則陽收其身而寶疏之說之以厚利則陰用其言顯棄其身矣此不可不察也夫事以密成語以泄敗未必其身泄之也而語及所匿之事如此者身危彼顯有所出事而乃以成它故說者不徒知所出而已矣又知其

所以為如此者身危規異事而當知者揣之外而得之
事泄於外必以為已也如此者身危周澤未渥也而詣
極知說行而有功則德忘說不行而有敗則見疑如此
者身危貴人有過端而說者明言禮義以挑其惡如此
者身危貴人或得計而欲自以為功說者與知焉如此
者身危強以其所不能為止以其所不能已如此者身
危故與之論大人則以為間已與之論細人則以為賣
重論其所愛則以為藉資論其所憎則以為嘗已徑省

其說則以為不智而拙之米鹽博辯則以為多而交之畧事陳意則曰怯懦而不盡慮事廣肆則曰草野而倨悔此說之難不可不知也凡說之務在知飾所說之所矜而減其所耻彼有私急也必以公義示而強之其意有下也然而不能已說者因為之飾其美而少其不為也冀心有高也而實不能及說者為之舉其過而見其愚而多其不行也有欲矜以智能則為之舉異事之同類者多為之地使之資說於我而佯不知也以資其智欲內相存之

言則必以美名明之而微見其合於私利也欲陳危害之事則顯其毀誹而微見其合於私患也譽異人與同行者規異事與同計者有與同汙者則必以大飾其無傷也有與同敗者則必以明飾其無失也彼自多其力則毋以其難概之也自勇其斷則毋以其謫怒之自智其計則毋以其敗窮之大意無所拂忤辭言無所繫縻然後極騁智辯焉此道所得親近不疑而得盡辭也伊尹為宰百里奚為虜胥所以干其上也此二人者皆聖人也然猶不能無役

身以進如此其汙也今以吾言為宰虜而可以聽用而振
世此非能仕之所耻也夫曠日彌久而周澤未渥深計而不
疑引爭而不罪則明割利害以致其功直指是非以飾其
身以此相持此說之成也昔者鄭武公欲伐胡先以其女
妻胡君以娛其意因問於羣臣吾欲用兵誰可伐者大夫
閼其思對曰胡可伐武公怒而戮之曰胡兄弟之國也子
言伐之何也胡君聞之以鄭為親已遂不備鄭鄭人襲胡
取之宋有富人天雨墻壞其子曰不築必將有盜其鄰

人之父亦云暮而果大亡其財其家甚智其子而疑隣
人之父此二人說者皆當矣厚者為戮薄者見疑則非
知之難也處知則難也故統朝之言當矣其為聖於晉
而為戮於秦也此不可不察昔者彌子瑕有寵於衛君
衛國之法竊駕君車者罪刖彌子母病人間往夜告彌
子彌子矯駕君車以出君聞而賢之曰孝哉為母之故
忘其刖罪異日與君游於果園食桃而甘不盡以其半
啗君君曰愛我哉忘其口味以啗寡人及彌子色衰愛

弛得罪於君君曰是固嘗矯駕吾車又嘗啗吾以餘桃故彌子之行未變於初也而以前之所以見賢而後獲罪者愛憎之變也故有愛於主則智當而加親有憎於主則智不當見罪而加疎故諫說談論之士不可不察愛憎之主而後說焉夫龍之為虫也柔可狎而騎也然其喉下有逆鱗徑尺若人有嬰之者則必殺人主亦有逆鱗說者能無嬰人主之逆鱗則幾矣

王霸篇 荀子

國者天下之制利用也人主者天下之利勢也得道以持之則大安也大榮也積美之源也不得道以持之則大危也大累也有之不如無之有也及其綦也索為匹夫不可得也齊湣宋獻是也故人主天下之利勢也然而不能自安也安之者必將道也故用國者義立而王信立而霸權謀立而亡三者明主之所謹擇也仁人之所務白也故挈國以呼禮義而無以害之行一不義殺一無罪而得天下仁者不為也櫟然扶持心國且若是

其固也之所與為之者之人則舉義士也之所以為布
陳於國家刑法者則舉義法也主之所極然帥羣臣而
首嚮之者則舉義志也如是則下仰上以義矣是其基
定也暴定而國定國定而天下定仲尼無置錐之地誠
義乎志意加義乎身行著之言語濟之日不隱乎天下
名垂乎後世今亦以天下之顯諸侯誠義乎志意加義
乎法則度量著之以政事榮申重之以貴賤殺生使襲
然終始猶一也如是則夫名聲之部發於天地之間也

豈不如日月雷霆然矣哉故曰以國齊義一日而白湯
武是也湯以毫武以鎬皆百里之地天下為一諸侯為
臣通達之屬莫不從服無它故焉以濟義矣是所謂義
立而王也德雖未至也義雖未濟也然而天下之理畧
奏矣刑賞已諾信乎天下矣臣下曉然皆知其可要也
政令已陳雖覩利敗不欺其民約結已定雖覩利敗不
欺其與如是則兵勁城固敵國畏之國一綦明與國信
之雖在僻陋之國威動天下五霸是也非本政教也非

致隆高也非暴文理也非服人之心也鄉方畧審勞佚
謹畜積修戰備鶻然上下相信而天下莫之敢當故齊
桓晉文楚莊吳闔閭越勾踐是皆僻陋之國也威動天
下強殆中國無它故焉畧信也是所謂信立而霸也絜
國以呼功利不務張其義齊其信唯利之求內則不憚
詐其民而求小利焉外則不憚詐其與而求大利焉內
不修正其所以有然常欲人之有如是則臣下百姓莫
不以詐心待其上矣上詐其下下詐其上則是上下析

也如是則敵國輕之與國疑之權謀日行而國不免危
削綦之而亡齊閔薛公是也故用強齊非以修禮義也非
以本政教也非以一天下也綿綿嘗以結引馳外為務
故強南足以破楚西足以訛秦北足以敗燕中足以舉
宋及以燕趙起而攻之若振槁然而身死國亡為天下
大戮後世言惡則必稽焉是無它故焉唯其不由禮義
而由權謀也三者明主之所謹擇也仁人之所務白也
善擇者制人不善擇者人制之國者天下之大器也重

任也不可不善為擇所而後錯之錯險則危不可不善為擇道然後道之塗歲則塞危塞則亡彼國錯者非封焉之謂也何法之道誰子之與也故道王者之法與王者之人為之則亦王道霸者之法與霸者之人為之則亦霸道亡國之法與亡國之人為之則亦亡三者明主之所謹擇也而仁人之所務白也故國者重任也不以積持之則不立故國者世所以新者也是憚憚非變也改玉改行也故一朝之日也一日之人也然而厭焉有

千歲之國何也曰援夫千歲之信法以持之也安與夫
千歲之信士為之也人無百歲之壽而有千歲之信士
何也曰以夫千歲之法自持者是乃千歲之信士矣故
與積禮義之君子為之則王與端誠信全之士為之則
霸與權謀傾覆之人為之則亡三者明主之所謹擇也
仁人之所務白也善擇之者制人不善擇之者人制之
彼持國者必不可獨也然則強國榮辱在於取相矣
身能相能如是者王身不能知恐懼而求能者如是強

身不能不知恐懼而求能者安唯便僻左右親比已者之用如是者危削暴之而亡國者巨用之則大小用之則小暴大而王暴小而亡小巨分流者存巨用之者先義而後利安不卹親疎不卹貴賤唯誠能之求夫是之謂巨用之小用之者先利而後義安不恤是非不治曲直唯便僻親比已者之用夫是之謂小用之巨用之者若彼小用之者若此小巨分流者亦一若彼也亦一若此也故曰粹而王駁而霸無一焉而亡此之謂也國無

禮則不正禮之所以正國也譬之猶衡之於輕重也猶
繩墨之於曲直也猶規矩之於方圓也故錯之而人莫
能誣也詩云如霜雪之將將如日月之光明為之則存
不為之則亡此之謂也國危則無樂君國安則無憂民
亂則國危治則國安今君人者急逐樂而緩治國豈不
過甚矣哉譬之是猶好聲色而恬無耳目也豈不哀哉
夫人之情目欲綦色耳欲綦聲口欲綦味鼻欲綦臭心
欲綦佚此五綦者人情之所必不免也養五綦者有具

無具則五暴者不可得而致也萬乘之國可謂廣大富厚矣加有治辯強固之道焉若是則恬愉無患難矣然後養五暴之具具也故百樂者生於治國者也憂患生於亂國者也急逐樂而緩治國者非知樂者也故明君者必將先治其國然後百樂得其中閭君者必將荒逐樂而緩治國故憂患不可勝校也必至於身死國亡然後止也豈不哀哉將以為樂乃得憂焉將以為安乃得危焉將以為福乃得死亡焉豈不哀哉於乎君人者亦

可以察若言矣故治國有道人主有職若夫貫日而治
詳一日而曲列之是以所使夫百吏官人為也不足以
是傷遊玩安燕之樂若夫論一相以兼率之使臣下百
吏莫不宿道鄉方而務是夫人主之職也若是則一天
下名配堯禹之主者守至約而詳事至佚而功垂衣裳
不下簾席之上而海內之民莫不願得以為帝王夫是
之謂至約樂莫大焉人主者以官人為能者也匹夫者
以自能為能者也人主得使人為之匹夫則無所移之

百畝一守事業窮無所移之也今以一人兼聽天下日有餘而治不足者使人為之也大有天下小有一國必自為之然後可則勞苦耗悴莫甚焉如是則雖臧獲不肯與天子易勢業以是縣天下一四海何故必自為之為之者役夫之道也墨子之說也論德使能而官施之者聖王之道也儒之所謹守也傳曰農分田而耕賈分貨而販百工分事而勸士大夫分職而聽建國諸侯之君分土而守三公總方而議則天子共已而已矣出若

入若天下莫不平均莫不治辯是百王之所同也而禮法之大分也百里之地可以取天下是不虛其難者在人主之知之也取天下者非負其土地而從之之謂也道足以一人而已矣彼其人苟一則其土地且奚去我而適它故百里之地其等位爵服足以容天下之賢士矣其官職事業足以容天下之能士矣脩其舊法擇其善者而明用之足以順服好利之民矣賢士一焉能士官焉好利之民服焉三者具而天下盡無有是其外矣

故百里之地足以竭勢矣致忠信著仁義足以竭人矣
兩者合而天下取諸侯後同者先危詩曰自西自東自
南自北無思不服一人之謂也羿蠻門者善服射者也
王良造父者善服馭者也聰明君子者善服人者也人
服而勢從之人不服而勢去之故王者已於服人矣故
人主欲得善射射遠中微則莫若羿蠻門矣欲得善馭
及速致遠則莫若王良造父矣欲調一天下制秦楚則
莫若聰明君子矣其用知甚簡其為事不勞而功名致

大甚易處而綦可樂也故明君以為寶而愚者以為難
夫貴為天子富有天下名為聖王兼制人人莫得而制
也是人情之所同欲也而王者兼而有是者也重色而
衣之重味而食之重財而制之合天下而君之飲食甚
厚聲樂甚大臺榭甚高園囿甚廣臣使諸侯一天下是
又人情之所同欲也而天子之禮制如是者也制度以
陳政令以挾官人失要則死公侯失禮則幽四方之國
有侈離之德則必滅名聲若日月功積如天地天下之

人應之如影嚮是又人情之所同欲也而王者兼而有
是者也故人之情口好味而臭味莫美焉耳好聲而聲
樂莫大焉目好色而文章致繁婦女莫衆焉形體好佚
而安重間靜莫愉焉心好利而穀祿莫厚焉合天下之
所同願兼而有之羣宰天下而制之若制子孫人苟不
狂惑憇陋者其誰能睹是而不樂也哉欲是之主並肩
而存違是之士不世絕千歲而不合何也曰人主不公
人臣不忠也人主則外賢而偏舉人臣則爭職而妬賢

是其所以不合之故也人主胡不廣焉無恤親疎無偏
貴賤唯誠能之求若是則人臣輕職業讓賢而安隨其
後如是則禹舜還至王業還起功一天下名配禹舜物
由有可樂如是其美者乎嗚呼君人者亦可以察若言
矣楊朱哭衛塗曰此夫過舉蹠步而覺趺千里者夫哀
哭之此亦榮辱安危存亡之衢已此其為可哀甚於衢
塗嗚呼哀哉君人者千歲而不覺也無國而不有治法
無國而不有亂法無國而不有賢士無國而不有罷士

無國而不有慮民無國而不有悍民無國而不有美俗
無國而不有惡俗兩者並行而國在上偏而國安在下
偏而國危上一而王下一而亡故其治法其佐賢其民
愿其俗美而四者齊夫是之謂上一是則不戰而勝
不攻而得甲兵不勞而天下服故湯以毫武王以鎬皆
百里之地也天下為一諸侯為臣通達之屬莫不服從
無他故焉四者齊也桀紂即序於有天下之勢索為正
夫不可得也是無它故焉四者並亡也故百王之法不

同若是所歸者一也上莫不致愛其下而制之以禮上
之於下如保赤子政令制度所以接下之人百姓有不
理者如豪末則雖孤獨鰥寡必不加焉故下之親上歡
如父母可殺而不可使不順君臣上下貴賤長幼至於
庶人莫不以是為隆正然後皆內自省以謹於分是百
王之所以同也而禮法之樞要也然後農分田而耕賈
分貨而販百工分事而勸士大夫分職而聽建國諸侯
之君分土而守三公總方而議則天子共已而正矣若

出若入天下莫不平均莫不治辯是百王之所同而禮法之大分也若夫貫日而治平權物而稱用使衣服有制宮室有度人徒有數喪祭械用皆有等宜以是用挾於萬物尺寸尋丈莫得不脩乎制數度量然後行則是官人使吏之事也不足數於大君子之前故君人者立隆政本朝而當所使要百事者誠仁人也則身佚而國治功大而名美上可以王下可以霸立隆政本朝而不當所使要百事者非仁人也則身勞而國亂功廢而名

辱社稷必危是人君者之樞機者也故能當一人而天下取失當一人而社稷危不能當一人而能當千人百人者說無之有也既能當一人則身有何勞而為垂衣裳而天下定故湯用伊尹文王用呂尚武王用召公成王用周公且卑者五霸齊桓公閨門之內懸樂奢泰游抗之修於天下不見謂修然九合諸侯一匡天下為五霸長是亦無它故焉知一政於管仲也是君人者之要守也知者易為之興力而功名綦大舍是而孰足為也

故古之有大功名者必道是者也喪其國危其身者必反是者也故孔子曰知者之知固以多矣有以守少能無察乎愚者之知固以少矣有以守多能無狂乎此之謂也治國者分已定則主相臣下百吏各謹其所聞不務聽其所不聞各謹其所見不務視其所不見所聞所見誠以齊矣則雖幽閒隱僻百姓莫敢不敬分安制以化其上是治國之徵也主道治近不治遠治明不治幽治一不治二主能治近則遠者理主能治明則幽者化

主能當一則百事正夫兼聽天下日有餘而治不足者
如此也是治之極也既能治近又務治遠既能治明又
務見幽既能當一又務正百是過者也過猶不及也辟之
是猶立直木而求其影之枉也不能治近又務治遠不
能察明又務見幽不能當一又務正百是悖者也辟之
是猶立枉木而求其影之直也故明主好要而闇主好
詳主好要則百事詳主好詳則百事荒君者論一相陳
一法明一指以兼覆之兼焰之以觀其盛者也相者論

列百官之長要百事之聽以飾朝廷臣下百吏之分度其功勞論其慶賞歲終奉其成功以效於君當則可不當則廢故君人勞於索之而休於使之

解蔽篇

荀子

凡人之患蔽於一曲而闇於大理治則復經兩疑則惑矣天下無二道聖人無兩心今諸侯異政百家異說則必或是或非或理或亂亂國之君亂家之人此其誠心莫不求正而以自為也妬繆於道而人誘其所迨也私

其所積唯恐聞其惡也倚其所私以觀異術唯恐聞其美也是以與治雖走而是已不輶也豈不蔽於一曲而失正求也哉心不使焉則白黑在前而目不見雷鼓在側而耳不聞況於使者乎德道之人亂國之君非之上亂家之人非之下豈不哀哉數為蔽欲為蔽惡為蔽始為蔽終為蔽遠為蔽近為蔽博為蔽淺為蔽古為蔽今為蔽凡萬物異則莫不相為蔽此心術之公患也昔人君之蔽者夏桀殷紂是也桀蔽於末喜斯觀而不知闕

龍逢以惑其心而亂其行紂蔽於妲己飛廉而不知微
子啓以惑其心而亂其行故羣臣去忠而事私百姓怨
非而不用賢良退處而隱逃此其所以喪九牧之地而
虛宗廟之國也桀死於亭山紂懸於赤旆身不先知又
莫之諫此蔽塞之禍也成湯鑒於夏桀故主其心而慎
治之是以能長用伊尹而身不失道此其所以代夏王
而受九牧文王鑒於殷紂故主其心而慎治之是以能
長用呂望而身不失道此其所以代殷王而受九牧遠

方莫不致其珍故目視備色耳聽備聲口食備味形居
備宮名受備號生則天下歌死則天下哭夫是之謂至
盛詩曰鳳凰秋秋其翼若干其聲若簫有鳳有凰樂帝
之心此不蔽之福也昔人臣之蔽者唐鞅奚齊是也唐
鞅蔽於欲權而逐載子奚齊蔽於欲國而罪申生唐鞅
戮於宋奚齊戮於晉逐賢相而罪孝兄身為刑戮然而
不知此蔽塞之禍也故以貪鄙背叛爭權而不滅亡者
自古及今未嘗有之也鮑叔寧戚隰朋仁智且不蔽故

能持管仲而名利福祿與管仲齊呂公呂望仁智且不
蔽故能持周公而名利福祿與周公齊傳曰知賢之謂
明輔賢之謂強勉之強之其福必長此之謂也此不蔽
之福也昔賓孟之蔽者亂家是也墨子蔽於用而不知
文宗子蔽於欲而不知得慎子蔽於法而不知賢申子
蔽於勢而不知知患子蔽於辭而不知實莊子蔽於天
而不知人故由用謂之道盡利也由俗謂之道盡嗛也
由法謂之道盡數矣由數謂之道盡便矣由辭謂之道

盡論矣由天謂之道盡因矣而此數具者皆道之一隅也夫道者體常而盡變一隅不足舉之曲知之人觀於道之一隅猶未之能識也故以為足而飾之内以自亂外以惑人上以蔽下下以蔽上此蔽塞之禍也孔子仁智且不蔽故學亂術足以為先王者也一家得周道舉而用之不蔽於成積也故德與周公齊名與三王並此不蔽之福也聖人知心術之患見蔽塞之禍故無欲無惡無始無終無近無遠無博無淺無古無今兼陳萬物

而中懸衡焉是故衆異不得相蔽以亂其倫何謂衡曰
道故心不可不知道心不知道則不可道而可非道人
孰欲得恣而守其所不可以禁其所可以其不可道之
心取人則必合於不道人而不知合於道人以其不可
道之心與不可道之人論道亂之本也故曰心知道然後
可道可道然後能守道以禁非道以其可道之心取人
則合於道人而不合於不道之人矣以其可道之心與
道人論非道治之要也何患不知故治之要存於知道

人何以知道曰心心何以知曰虛一而靜心者形之君也而神明之主也出令而無所受令自禁也自使也自奪也自取也自行也自止也故口可劫而使墨云形可劫而使謗申心不可劫而使易意是之則受非之則辭故曰心容其擇也無禁必自見其物也雜博其情之至也不貳詩云采采卷耳不盈頃筐嗟我懷人寘彼周行頃筐易滿也卷耳易得也然而不可以貳周行故曰心枝則無知傾則不精貳則疑惑以贊稽之萬物可兼知

也身盡其故則美類不可兩也故知者擇一而一焉農
精於田而不可以為田師賈精於市而不可以為賈師
工精於器而不可以為器師有人也不能此三技而可
使治三官曰精於道者也精於物者也精於物者以物
物精於道者兼物物故君子一於道而以贊稽物一於
道則正以贊稽物則察以正志行察論則萬物官矣昔
者舜之治天下也不以事詔而萬物成處一之危其榮
滿側養一之微榮矣而未知故道經曰人心之危道心

之微危微之幾惟明君子而後能知之故人心譬如槃水正錯而勿動則湛濁在下而清明在上則足以見鬚眉而察理矣微風過之湛濁動乎下清明亂於上則不可以得大形之正也心亦如是矣薰之以理養之以清物莫之傾則足以定是非決嫌疑矣小物引之則其正外易其心內傾則不足以決粗理也故好書者衆矣而蒼頡獨傳者一也好稼者衆矣而后稷獨傳者一也好樂者衆矣而夔獨傳者一也好義者衆矣而舜獨傳者

一也倕作弓淳游作矢而羿精於射奚仲作車乘杜作乘馬而造父精於御自古及今未嘗有兩而能精者也曾子曰視其庭可以搏鼠惡能與我歌乎空石之中有人焉其名曰般其為人也善射以好思耳目之欲接則敗其思蚊虫之聲聞則挫其精是以闢耳目之欲而遠蚊虫之聲閒居靜思則通思仁若是可謂微乎孟子惡敗而出妻可謂能自強矣有子惡卧而猝掌可謂能自忍矣未及好也闢耳目之欲可謂能自強矣未及思也

蚊蟲之聲聞則挫其精可謂危矣未可謂微也夫微者至人也至人也何強何忍何危故濁明外景清明內景聖人縱其欲兼其情而制焉者理矣夫何強何忍何危故仁者之行道也無為也聖人之行道也無疆也仁者之思也恭聖人之思也樂此理心之道也凡觀物有疑中心不定則外物不清吾慮不清則未可定然否也冥冥而行者見寢石以為伏虎也見植林以為後人也冥冥蔽其明也醉者越百步之溝以為蹠步之澗俯而出

城門以為小之閨也酒亂其神也厭目而視者視一以為兩掩耳而聽者聽漠漠以為响响勢亂其官也故從山上望牛者若羊而求羊者不下牽也遠蔽其大也從山下望木者十仞之木若箸而求箸者不上折也高蔽其長也水動而影搖人不以定美惡水勢玄也瞽者仰視而不見星人不以定有無用精惑也有人焉以此時定物則世之愚者也彼愚者之定物以疑决疑决必不當夫苟不當安能無過乎夏首之南有人焉曰消蜀梁

其為人也愚以善畏明月而宵行俯見其影以為伏鬼
也仰視其髮以為立魅也背而走比至其家失氣而死
豈不哀哉凡人之有鬼也必以其感忽之間疑玄之時
正之此人之所以無有而有無之時也而已以正事故
傷於溼而擊鼓鼓痺則必有蔽鼓喪豚之費矣而未有
俞疾之福也故雖不在夏首之南則無以異矣凡以知
人之性也可以知物之理也以可知人之性求可知物
之理而無所疑止之則沒世窮年不能徧也其所以貫

理焉雖億萬已不足以浹萬物之變與愚者若一學老子長子而與愚者若一猶不知錯夫是之謂妄人故學也者固學止之也惡乎止之曰止諸至足曷謂至足曰聖也聖也者盡倫者也王也者盡制者也兩盡者足以為天下極矣故學者以聖王為師案以聖王之制為法法其法以求其統類以務象效其人嚮是而務士也類是而幾君子也知之聖人也故有知非以慮是則謂之懼有勇非以持是則謂之賊察孰非以分是則謂之篡

多能非以修蕩是則謂之知辯利非以言是則謂之訛
傳曰天下有二非察是是察非謂合王制與不合王制
也天下有不以是為隆正也然而猶有能分是非治曲
直者耶若夫非分是非非治曲直非辯治亂非治人道
雖能之無益於人不能之無損於人案直將治怪說玩
奇辭以相撓滑也案強鉗而利口厚顏而忍詬無正而
恣睢妄辯而幾利不好辭讓不敬禮節而好相推擠此
亂世奸人之說也則天下之治說者方多然矣傳曰析

辭而為察言物而為辯君子賤之博聞強志不合王制君子賤之此之謂也為之無益於成也求之無益於得也憂戚之無益於幾也則廣焉能克之矣不以自妨也不少頃干之胷中不慕往不閑來無邑憐之心當時則動動至而應事起而辯治亂可否昭然明矣周而成泄而敗明君無之有也宣而成隱而敗闇君無之有也故君人者周則讒言至矣而直言反矣小人邇而君子遠矣詩曰墨以為明狐狸而蒼此言上幽而下險也君人

者宣則直言至矣而讒言反矣君子邇而小人遠矣詩
云明明在下赫赫在此言上明而下化也

性惡篇

荀子

人之性惡其善者偽也今人之性生而有好利焉順是
故爭奪生而辭讓亡焉生而有疾惡焉順是故殘賊生
而忠信亡焉生而有耳目之欲有好聲色焉順是故淫
亂生而禮義文理亡焉然則從人之性順人之情必出
於爭奪合於犯分亂理而歸於暴故必將有師法之化

禮義之道然後出於辭讓合於文理而歸於治用此觀之然則人之性惡明矣其善者偽也故拘木必將待櫛枯然矯然後直鈍金必將待礪厲然後利今人之性惡必將待師法然後正得禮義然後治今人無師法則偏險而不正無禮義則悖亂而不治古者聖人以人之性惡以為偏險而不正悖亂而不治是以為之起禮義制法度以矯飾人之情性而正之以擾化人之情性而道之也使皆出於治合於道者也今人化師法積文學道

禮義者為君子縱性情安恣睢慢禮義者為小人用此觀之然則人之性惡明矣其善者偽也孟子曰人之學者其性善曰是不然者不及知人之性而不察乎性偽之分者也凡性者天之就也不可學不可事禮義者聖人之所生也人之所學而能所事而成者也不可學不可事而在人者謂之性可學而能可事而成在人者謂之偽是性偽之分也今人之性目可以見耳可以聽夫可以見之明不離目可以聽之聰不離耳目明而耳聰

不可學明矣孟子曰今之人性善將皆失喪其性故也
曰若是則過矣今之人性生而離其朴離其資必失而
喪之用此觀之然則人之性惡明矣所謂性善者不離
其朴而美之不離其資而利之也使夫資朴之於美心
意之於善若夫可以見之明不離目可以聽之聰不離
耳故曰目明而耳聰也今人之性飢而欲飽寒而欲煖
勞而欲休此人之情性也今人飢見長而不敢先食者
將有所讓也勞而不敢求息者將有所代也夫子之讓

乎父弟之讓乎兄子之代父弟之代兄此二行者皆反於性而悖於情也然而孝子之道禮義之文理也故順情性則不辭讓矣辭讓則悖於情性矣用此觀之然則人之性惡明矣其善者偽也問者曰人之性惡則禮義惡生應之曰凡禮義者是生於聖人之偽非故生於人之性也故陶人埏埴而為器然則器生於工人之偽非故生於人之性也故工人斷木而成器然則器生於工人之偽非故生於人之性也聖人積思慮習偽故以生

禮義而起法度然則禮義法度者是生聖人之偽非故
生於人之性也若夫目好色耳好聲口好味心好利骨
體膚理好愉快是皆生於人之情性也感而自然不待
事而後生之者也夫感而不能然必且待事而後然者
人之生於偽是性偽之所生其不同之徵也故聖人化
性而起偽偽起而生禮義禮義生而制法度然則禮義
法度者是聖人之所生也故聖人之所以同於衆其不
異於衆者性也所以異而過衆者偽也夫好利而欲得

者此人之情性也假之有弟兄資財而分者且順情性
好利而欲得若是則兄弟相拂奪矣且化禮義之文理
若是則讓乎國人矣故順性情則弟兄爭矣化禮義則
讓國人矣凡人之欲為善者為性惡也夫薄願厚惡願
美狹願廣貧願富賤願貴苟無之中者必求於外故富
而不願財貴而不願勢苟有之中者不及於外用此觀
之人之欲為善者為性惡也今人之性固無禮義故強
學而求有之也性不知禮義故思慮而求知之也然則

性而已則人無禮義不知禮義人無禮義則亂不知禮
義則悖然則性而已則悖亂在己用此觀之人之性惡
明矣其善者偽也孟子曰人之性善曰是不然凡古今
天下之所謂善者正理平治也所謂惡者偏險悖亂也
是善惡之分也已今誠以人之性固正理平治邪則有
惡用聖王惡用禮義矣哉雖有聖王禮義將曷加於正
理平治也哉今不然人之性惡故古者聖人以人之性
惡以為偏險而不正悖亂而不治故為之立君上之勢

以臨之明禮義以化之起法正以治之重刑罰以禁之使天下皆出於治合於善也是聖王之治而禮義之化也今當試去君上之勢無禮義之化去法正之治無刑罰之禁倚而觀天下民之相與也若是則夫强者害弱而奪之衆者暴寡而譁之天下之悖亂而相亡不待頃矣用此觀之然則人之性惡明矣其善者偽也故善言古者必有節於今善言天者必有徵於人凡論者貴其有辯合其符驗故坐而言之起而可設張而可施行今

孟子曰人之性善無辨不合符驗坐而言之起而不可設張而不可施行豈不過甚矣哉故性善則去聖王息禮義矣性惡則興聖王貴禮義矣故檻括之生為拘木也繩墨之起為不直也立君上明禮義為性惡也用此觀之然則人之性惡明矣其善者偽也直木不待檻括而直者其性直也杓木必將待檻括然後直者以其性不直也今人之性惡必將待聖王之治禮義之化然後皆出於治合於善也用此觀之則人之性惡明矣

其善者偽也問者曰禮義積偽者是人之性故聖人能生之也應之曰是不然夫陶人埏埴而生瓦然則瓦埴豈陶人之性也哉工人斲木而生器然則器木豈工人之性也哉夫聖人之於禮義也辟亦陶埴而生之也然則禮義積偽者豈人之性也哉凡人之性者堯舜之與桀跖也其性一也君子之與小人其性一也今將以禮義積偽人之性耶然則有曷貴堯禹曷貴君子矣哉凡所貴堯禹君子者能化性能起偽偽起而生禮義然則

聖人之於禮義積偽也亦陶埏而生之也用此觀之然則禮義積偽豈人之性也哉所賤於桀跖小人者從其性順其情安恣睢以出乎貪利爭奪故人之性惡明矣其善者偽也天非私曾騫孝已而外衆人也然則曾騫孝已獨厚於孝之實而全於孝之名者何也以綦禮義故也天非私齊魯之民而外秦人也然而於父子之義夫婦之別不如齊魯之孝具敬文者何也以秦人之從情性安恣睢慢於禮義故也豈其性異矣哉塗之人可

以為禹曷謂也曰凡禹之所以為禹者以其為仁義法正也然則仁義法正有可知可能之理然而塗之人也皆有可以知仁義法正之質皆有可以能仁義法正之具然則其可以為禹明矣今以仁義法正為固無可知可能之理邪然則唯禹不知仁義法正不能仁義法正也將使塗之人固無可以知仁義法正之質而固無可以能仁義法正之具邪然則塗之人也且內不可以知父子之義外不可以知君臣之正不然今塗之人者皆

內可以知父子之義外可以知君臣之正然則其可以知之質可以能之具其在塗之人明矣今使塗之人者以其可以知之質可以能之具本夫仁義可知之理可能之具然則其可以為禹明矣今使塗之人伏術為學專心一志思索熟察加日縣久積善而不息則通於神明參於天地矣故聖人者人之所積而致也曰聖可積而致然而皆不可積何也曰可以而不可使也故小人可以為君子而不肯為君子君子可以為小人而不肯

為小人小人君子者未嘗不可以相為也然而不相為者可以而不可使也故塗之人可以為禹則然塗之人能為禹未必然也雖不能為禹無害可以為禹足可以徧行天下然而未嘗有能徧行天下者也夫工匠農賈未嘗不可以相為事也然而未嘗能相為事也用此觀之然則可以為未必能也雖不能無害可以為然則能不能之與可不可其不同遠矣其不可以相為明矣堯問於舜曰人情何如舜對曰人情甚不美又何問焉妻

子具而孝衰於親嗜欲得而信衰於友爵祿盈而忠衰
於君人之情乎人之情乎甚不美又何問焉唯賢者為
不然有聖人之知者有士君子之知者有小人之知者
有役夫之知者多言則文而類終日議其所以言之半
舉萬變其統類一也是聖人之知也少言則徑而省論
而法若佚之以繩是士君子之知也其言也諂其行也
悖其舉事多悔是小人之知也齊給便敏而無類雜能
旁覓而毋用折速粹熟而不急不恤是非不論曲直以

期勝人為意是役夫之知也有上勇者有中勇者有下
勇者天下有中敢直其身先王有道敢行其意上不循
於亂世之君下不俗於亂世之民仁之所在無貧窮仁
之所亡無富貴天下知之則欲與天下同苦樂之天下
不知之則傀然獨立天地之間而不畏是上勇也禮恭
而意儉大齊信焉而輕貨財賢者敢推而上之不肖者
敢援而廢之是中勇也輕身而重貨恬禍而廣解苟不
恤是非然不然之情以期勝人為意是下勇也繁弱鉅

泰古之良弓也然而不得排撤則不能自正桓公之葱
太公之闕文王之錄莊君之胷闔閭干將莫邪鉅闕辟
闔此皆古之良劍也然而不加砥礪則不能利不得人
力則不能斷驛驅騏驥驥纖離緣耳此皆古之良馬也然
而前必有銜轡之制後有鞭策之威加之以造父之馭
然後一日而致千里也夫人雖有性質美而心辯知必
將求賢師而事之擇賢友而友之得賢師而事之則所
聞者克舜禹湯之道也得良友而友之則所見者忠信

敬讓之行也身日進於仁義而不自知也者靡使然也
今與不善人處則所聞者欺誣詐偽也所見者汙漫淫
邪貪利之行也身且加於刑戮而不自知者靡使然也
傳曰不知其子視其友不知其君視其左右靡而已矣

正名篇

荀子

凡語治而待去欲者無以道欲而困於有欲者也凡語
治而待寡欲者無以節欲而困於多欲者也有欲無欲
異類也生死也非治亂也欲之多寡異類也情之所也

非治亂也欲不待可得而求者從所可欲不待可得所受乎天也求者從所可受乎心也故欲過之而動不及心止之也心之所可中理則欲雖多奚傷於治欲不及而動過之心使之也心之所可失理則欲雖寡奚止於亂故理亂在於心之所可亡於情之所欲不求之其所在而求之其所亡雖曰我得之失之矣性者天之就也情者性之質也欲者情之應也以欲為可得而求之情之所必不免也以為可而道之知所必出也故雖為守

門欲不可去性之具也雖為天子欲不可盡欲雖不可
盡可以近盡也欲雖不可去求可節也所欲雖不可盡
求者猶近盡欲雖不可去所求不得慮者欲節求也道
者進則近盡退則節求天下莫之若也凡人莫不從其
所可而去其所不可知道之知莫之若也而不從道者
無之有也假之有人而欲南無多而惡北無寡豈為夫
南者之不可盡也離南行而北走也哉今人所欲無多
所惡無寡豈為夫欲之不可盡也離得欲之道而取所

惡也哉故可道而從之奚以損之而亂不可道而離之
奚以益之而治故知者論道而已矣小家珍說之所願
皆衰矣凡人之取也所欲未嘗粹而來也其去也所惡
未嘗粹而往也故人無動而不與權俱衡不正則重懸
於仰而人以為輕輕懸於俛而人以為重此人所以惑
於輕重也權不正則禍託於欲而人以為福福託於惡
而人以為禍此亦人所以惑於禍福也道者古今之正
權也離道而內自擇則不知禍福之所託易者以一易

一人曰無得亦無喪也以一易兩人曰無喪而有得也
以兩易一人曰無得而有喪也計者取所多謀者從所可
以兩易一人莫之為明其數也從道而出猶以一易兩
也奚喪離道而內自擇是猶以兩易一也奚得累百年
之欲易一時之嫌然且為之不明其數也有嘗試深觀
其隱而難其察者志輕理而不重物者無之有也外重
物而不內憂者無之有也行離理而不外危者無之有
也外危而不內恐者無之有也心憂恐則口銜芻豢而

不知其味耳聽鍾鼓而不知其聲目視黼黻而不知其
狀輕煖平簟而體不知其安故嚮萬物之美而不能嘸
也假問而嘸之則不能離也故嚮萬物之美而盛憂兼
萬物之利而盛害如此者其求物也養生也粥壽也故
欲養其欲而縱其情欲養其性而危其形欲養其樂而
攻其心欲養其名而亂其行如此者雖封侯稱君其與
盜無以異雖乘軒戴紱其與無足無以異夫是之謂以
己為物役矣心平愉則色不及傭而可以養目聲不及

備而可以養耳蔬食菜羹而可以養口篋布之衣篋紃
之履而可以養體屋室廬廩葭葦辱尚几筵而可以養
形故無萬物之美而可以養樂無勢利之位而可以養
名如是而加天下焉其為天下多其和樂少矣夫是之
謂重己役物無稽之言不見之行不聞之謀君子慎之



文編卷二十五

欽定四庫全書

集部

文編卷二十六

七

詳校官檢討臣德生

侍讀臣孫球覆勘

總校官進士臣楊懋珩

校對官編修臣汪鏞

謄錄監生臣任應銑

欽定四庫全書

文編卷二十六

明 唐順之 編

作戰孫子

孫子曰凡用兵之法馳車千駟革車千乘帶甲十萬千里饋糧內外之費賓客之用膠漆之材車甲之奉日費千金然後十萬之師舉矣其用戰也勝久則鈍兵挫銃攻城則力屈久暴師則國用不足夫鉗兵挫銃屈力殲

貨則諸侯乘其弊而起雖有智者不能善其後矣故兵聞拙速未覩巧之久也夫兵久而國利者未之有也故不盡知用兵之害者則不能盡知用兵之利也善用兵者役不再籍糧不三載取用於國因糧於敵故軍食可足也國之貧於師者遠輸遠輸則百姓貧近師者貴賣貴賣則百姓財竭財竭則急於丘役力屈財殲中原內虛於家百姓之費十去其七公家之費破軍罷馬甲冑矢弓戟盾矛櫓丘牛大車十去其六故智將務食於敵

食敵一鍾當吾二十鍾芑秆一石當吾二十石故戰敵者怒也取敵之利者貨也車戰得車十乘以上賞其先得者而更其旌旗車雜而乘之卒善而養之是謂勝敵而益強故兵貴勝不貴久故知兵之將民之司命國家安危之主也

虛實孫子

孫子曰凡先處戰地而待敵者佚後處戰地而趨戰者勞故善戰者致人而不致於人能使敵人自至者利之

也能使敵人不得至者害之也故敵佚能勞之飽能饑之安能動之出其所不趨趨其所不意行千里而不勞者行於無人之地也攻而必取者攻其所不守也守而必固者守其所不攻也故善攻者敵不知其所守善守者敵不知其所攻微乎微乎至於無形神乎神乎至於無聲故能為敵之司命進而不可禦者衝其虛也退而不可及也夫我欲戰敵雖高壘深溝不得不與我戰者攻其所必救也我不欲戰雖畫地而守之敵不得與我

戰者乘其所之也故形人而我無形則我專而敵分我專為一敵分為十是以十攻其一也則我衆敵寡能以衆擊寡則吾之所與戰者約矣吾所與戰之地不可知不可知則敵所備者多敵所備者多則吾所與戰者寡矣故備前則後寡備後則前寡備左則右寡備右則左寡無所不備則無所不寡寡者惰人者也衆者使人備己者也故知戰之地知戰之日則可千里而會戰不知戰地不知戰日則左不能救右右不能救左前不能救

後後不能救前而況遠者數十里近者數里乎以吳度之越人之兵雖多亦奚益於勝哉故曰勝可為也敵雖衆可使無鬪故策之而知得失之計作之而知動靜之理形之而知死生之地角之而知有餘不足之處故形兵之極至於無形無形則深間不能窺智者不能謀因形而措勝於衆衆不能知人皆知我所以勝之形而莫知吾所以制勝之形故其戰勝不復而應形於無窮夫兵形象水水之形避高而趨下兵之形避實而擊虛水

因地而制流兵因敵而制勝故兵無常勢水無常形能
因敵變化而取勝者謂之神故五行無常勝四時無常
位日有短長月有死生

兵勢

孫子

孫子曰凡治衆如治寡分數是也鬪衆如鬪寡形名是
也三軍之衆可使必受敵而無敗者奇正是也兵之所
加如以碷投卵者虛實是也凡戰者以正合以奇勝故
善出奇者無窮如天地不竭如江海終而復始日月是

也死而更生四時是也聲不過五五聲之變不可勝聽
也色不過五五色之變不可勝觀也味不過五五味之
變不可勝嘗也戰勢不過奇正奇正之變不可勝窮也
奇正相生如循環之無端孰能窮之哉激水之疾至於
漂石者勢也鷙鳥之疾至於毀折者節也故善戰者其
勢陰其節短勢如擴弩節如發機紛紛紜紜鬪亂而不
可亂渾渾沌沌形圓而不可敗亂生於治怯生於勇弱
生於強治亂數也勇怯勢也強弱形也故善動敵者形

之敵必從之予之敵必取之以利動之以本待之故善
戰者求之於勢不責於人故能擇人而任勢任勢者其
戰人也如轉木石木石之性安則靜危則動方則止圓
則行故善戰人之勢如轉圓石於千仞之山者勢也

軍形

孫子

孫子曰昔之善戰者先為不可勝以待敵之可勝不可
勝在己可勝在敵故善戰者能為不可勝不能使敵之
必可勝故曰勝可知而不可為不可勝者守也可勝者

攻也守則不足攻則有餘善守者藏於九地之下善攻者動於九天之上故能自保而全勝也見勝不過衆人之所知非善之善者也戰勝而天下曰善非善之善者也故舉秋毫不為多力見日月不為明目聞雷霆不為聰耳古之所謂善戰者勝於易勝者也故善戰者之勝也無智名無勇功故其戰勝不忒不忒者其所措勝勝已敗者也故善戰者立於不敗之地而不失敵之敗也是故勝兵先勝而後求戰敗兵先戰而後求勝善用兵

者脩道而保法故能為勝敗之政兵法一曰度二曰量
三曰數四曰稱五曰勝地生度度生量量生數數生稱
稱生勝故勝兵若以鑑稱銖敗兵若以銖稱鑑勝者之
戰若決積水於千仞之谿者形也

九地

孫子

孫子曰用兵之法有散地有輕地有爭地有交地有衢
地有重地有圮地有圍地有死地諸侯自戰其地者為
散地入人之地而不深者為輕地彼得有利我得亦利

者為爭地我可以往彼可以來者為交地諸侯之地三屬先至而得天下之衆者為衢地入人之地深背城邑多者為重地山林險阻沮澤凡難行之道者為圮地所由入者隘所從歸者迂彼寡可以擊吾之衆者為圍地疾戰則存不疾戰則亡者為死地是故散地則無戰輕地則無止爭地則無攻交地則無絕衢地則合交重地則掠圮地則行圍地則謀死地則戰古之善用兵者能使敵人前後不相及衆寡不相恃貴賤不相救上下不

相收卒離而不集兵合而不齊合於利而動不合於利而止敢問敵衆整而將來待之若何曰先奪其所愛則聽矣兵之情主速乘人之不及由不虞之道攻其所不戒也凡為客之道深入則專主人不克掠於饒野三軍足食謹養而勿勞并氣積力運兵計謀為不可測投之無所往死且不北死焉不得亡人盡力兵士甚陷則不懼無所往則固深入則拘不得已則鬪是故其兵不脩而戒不求而得不約而親不令而信禁祥去疑至死無

所之吾士無餘財非惡貨也無餘命非惡壽也今發之
日士卒坐者涕沾襟偃卧者涕交頤投之無所往諸勦
之勇也故善用兵者譬而率然率然者常山之蛇也擊
其首則尾至擊其尾則首至擊其中則首尾俱至敢問
可使如率然乎曰可夫吳人與越人相惡也當其同舟
濟而遇風其相救也如左右手是故方馬埋輪未足恃
也齊勇若一政之道也剛柔皆得地之理也故善用兵
者攜手若使一人不得已也將軍之事靜以幽正以治

能愚士卒之耳目使之無知易其事革其謀使人無識易其居迂其途使人不得慮帥與之期如登高而去其梯帥與之深入諸侯之地而發其機若驅羣羊驅而往驅而來莫知所之聚三軍之衆投之於險此將軍之事也九地之變屈伸之利人情之理不可不察也凡為客之道深則專淺則散去國越境而師者絕地也四通者衢地也入深者重地也入淺者輕地也背固前隘者圍地也無所往者死地也是故散地吾將一其志輕地吾將使之屬爭地吾將

趨其後交地吾將謹其守衢地吾將固其結童地吾將繼其食圮地吾將進其途圍地吾將塞其闕死地吾將示之以不活故兵之情圍則禦不得已則鬪過則從是故不知諸侯之謀者不能豫交不知山林險阻沮澤之形者不能行軍不用嚮導者不能得地利四五者一不知非霸王之兵也夫霸王之兵伐大國則其衆不得聚威加於敵則其交不得合是故不爭天下之交不養天下之權信已之私威加於敵故其城可拔其國可隳施無法之賞懸無政之

令犯三軍之衆若使一人犯之以事勿告以言犯之以利勿告以害投之亡地然後存陷之死地然後生夫衆陷於害然後能為勝敗故為兵之事在順詳敵之意兵力一向千里殺將是謂巧能成事是故政舉之日夷關折符無通其使厲於廟堂之上以誅其事敵人開闔必亟入之先其所愛微與之期踐墨隨敵以決戰事是故始如處女敵人開戶後如脫兔敵不及拒

始計

孫子

孫子曰兵者國之大事死生之地存亡之道不可不察也故經之以五事校之以計而索其情一曰道二曰天三曰地四曰將五曰法道者令民與上同意可與之死可與之生而不畏危也天者陰陽寒暑時制也地者遠近險易廣狹死生也將者智信仁勇嚴也法者曲制官道主用也凡此五者將莫不聞知之者勝不知者不勝故校之以計而索其情曰主孰有道將孰有能天地孰得法令孰行兵衆孰強士卒孰練賞罰孰明吾以此知

勝負矣將聽吾計用之必勝留之將不聽吾計用之必敗去之計利以聽乃為之勢以佐其外勢者因利而制權也兵者詭道也能而示之不能用而示之不用近而示之遠遠而示之近利而誘之亂而取之實而備之強而避之怒而撓之卑而驕之佚而勞之親而離之攻其無備出其不意此兵家之勝不可先傳也夫未戰而廟算勝者得算多也未戰而廟算不勝者得算少也多算勝少算不勝而況於無算乎吾以此觀之勝負見矣

謀攻孫子

孫子曰夫用兵之法全國為上破國次之全軍為上破軍次之全旅為上破旅次之全卒為上破卒次之全伍為上破伍次之是故百戰百勝非善之善者也不戰而屈人之兵善之善者也故上兵伐謀其次伐交其次伐兵其下攻城攻城之法為不得已脩橹轡轔具器械三月而後成距堙又三月而後已將不勝其忿而蟻附之殺士卒三分之一而城不拔者此攻之災也故善用兵

者屈人之兵而非戰也拔人之城而非攻也毀人之國而非久也必以全爭於天下故兵不頓而利可全此謀攻之法也故用兵之法十則圍之五則攻之倍則分之敵則能戰之少則能逃之不若則能避之故小敵之堅大敵之擒也夫將者國之輔也輔周則國必強輔隙則國必弱故君之所以患於軍者三不知三軍之不可以進而謂之進不知三軍之不可以退而謂之退是謂糜軍不知三軍之事而同三軍之政則軍士惑矣不知三

軍之權而同三軍之任則軍士疑矣三軍既惑且疑則諸侯之難至矣是謂亂軍引勝故知勝有五知可以與戰不可以與戰者勝識衆寡之用者勝上下同欲者勝以虞待不虞者勝將能而君不御者勝此五者知勝之道也故曰知彼知已百戰不殆不知彼而知已一勝一負不知彼不知已每戰必敗

軍爭孫子

孫子曰凡用兵之法將受命於君合軍聚衆交和而舍

莫難於軍爭軍爭之難者以迂為直以患為利故迂其途而誘之以利後人發先人至此知迂直之計者也故軍爭為利衆爭為危舉軍而爭利則不及委軍而爭利則輜重捐是故捲甲而趨日夜不處倍道兼行百里而爭利則擒三將軍勁者先疲者後其法十一而至五十里而爭利則蹶上將軍其法半至三十里而爭利則三分之二至軍無輜重則亡無糧食則亡無委積則亡故不知諸侯之謀者不能豫交不知山林險阻沮澤之形

者不能行軍不用嚮道者不能得地利故兵以詐立以利動以分合為變者也故其疾如風其徐如林侵掠如火不動如山難知如陰動如雷霆掠鄉分衆廓地分利懸權而動先知迂直之計者勝此爭軍之法也軍政曰言不相聞故為之金鼓視不相見故為之旌旗夫金鼓旌旗者所以一人之耳目也人既專一則勇者不得獨進怯者不得獨退此用衆之法也故夜戰多火鼓晝戰多旌旗所以變人之耳目也三軍可奪氣將軍可奪心

是故朝氣銳晝氣惰暮氣歸善用兵者避其銳氣擊其惰歸此治氣者也以治待亂以靜待譁此治心者也以近待遠以佚待勞以飽待饑此治力者也無邀正正之旗勿擊堂堂之陳此治變者也故用兵之法高陵勿向背丘勿逆佯北勿從銳卒勿攻餌兵勿食歸師勿過圍師必闕窮寇勿追此用兵之法也

地形篇子

孫子曰地形有通者有掛者有支者有隘者有險者有

遠者我可以往彼可以來故曰通通形者先居高陽利糧道以戰則利可以往難以返曰掛掛形者敵無備出而勝之敵若有備出而不勝難以返不利我出而不利彼出而不利曰支支形者敵雖利我我無出也引而去之令敵半出而擊之利隘形者我先居之必盈之以待敵若敵先居之盈而勿從不盈而從之險形者我先居之必居高陽以待敵若敵先居之引而去之勿從遠形者勢均難以挑戰戰而不利凡此六者地之道也將之

至任不可不察也故兵有走者有弛者有陷者有崩者
有亂者有北者凡此六者非天地之災將之過也夫勢
均以一擊十曰走卒強吏弱曰弛吏強卒弱曰陷大吏
怒而不服遇敵懾而自戰將不知其能曰崩將弱不嚴
教道不明吏卒無常陳兵縱橫曰亂將不能料敵以少
合衆以弱擊強兵無選鋒曰北凡此六者敗之道也將
之至任不可不察也夫地形者兵之助也料敵制勝計
險阨遠近上將之道也知此而用戰者必勝不知此而

用戰者必敗故戰道必勝主曰無戰必戰可也戰道不勝主曰必戰無戰可也故進不求名退不避罪唯民是保而利於主國之寶也視卒如嬰兒故可與之赴深溪視卒如愛子故可與之俱死愛而不能令厚而不能使亂而不能治譬如驕子不可用也知吾卒之可以擊而不知敵之不可擊勝之半也知敵之可擊知吾卒之可以擊之不可以擊勝之半也知敵之可擊知吾卒之可以擊而不知地形之不可以戰勝之半也故知兵者動而不

迷舉而不窮故曰知彼知已勝乃不殆知天知地勝乃可全

九變

孫子

孫子曰凡用兵之法將受命於君合軍聚衆圮地無舍衢地合交絕地無留圍地則謀死地則戰途有所不由軍有所不擊城有所不攻地有所不爭君命有所不受故將通於九變之利者知用兵矣將不通九變之利雖知地形不能得地之利矣治民不知九變之術雖知五

利不能得人之用矣是故智者之慮必雜於利害雜於利而務可信也雜於害而患可解也是故屈諸侯者以害後諸侯者以業趨諸侯者以利故用兵之法無恃其不來恃吾有以待之無恃其不攻恃吾有所不可攻也故將有五危必死可殺必生可虜忿速可侮廉潔可辱愛民可煩凡此五者將之過也用兵之災也覆軍殺將必以五危不可不察也

火攻

孫子

孫子曰凡火攻有五一曰火人二曰火積三曰火輜四
曰火庫五曰火隊行火必有因煙火必素具發火有時
起火有日時者天之燥也日者月在箕壁翼軫也凡此
四宿者風起之日也凡火攻必因五火之變而應之火
發於內則早應之於外火發而其兵靜者待而勿攻極
其火力可從而攻之不可從而止火可發於外無待於
內以時發火發上風無攻下風晝風久夜風止凡軍必
知五火之變以數守之故以火佐攻者明以水佐攻者

強水可以絕不可以奪夫戰勝攻取而不脩其功者凶
命曰費留故曰明主慮之良將脩之非利不動非得不
用非危不戰主不可以怒而興師將不可以愠而致戰
合於利而動不合於利而止怒可以復喜愠可以復悅
亡國不可以復存死者不可以復生故明君慎之良將
警之此安國全軍之道也

用間

孫子

孫子曰凡興師十萬出征千里百姓之費公家之奉日

費千金內外騷動怠於道路不得操事者七十萬家相
守數年以爭一日之勝而愛爵祿百金不知敵之情者
不仁之至也非人之將也非主之佐也非勝之主也故
明君賢將所以動而勝人或功出於衆者先知也先知
者不可取於鬼神不可象於事不可驗於度必取於人
知敵之情者也故用間有五有因間有內間有反間有
死間有生間五間俱起莫知其道是謂神紀人君之寶
也因間者因其鄉人而用之內間者因其官人而用之

反間者因其敵間而用之死間者為誑事於外令吾間知之而傳於敵間也生間者反報也故三軍之事莫親於間賞莫厚於間事莫密於間非聖智不能用間非仁義不能使間非微妙不能得間之實微哉微哉無所不用間也間事未發而先聞者間與所告者皆死凡軍之所欲擊城之所欲攻人之所欲殺必先知其守將左右謁者門者舍人之姓名令吾間必索知之必索敵間之來間我者因而利之導而舍之故反間可得而用也因

是而知之故鄉間內間可得而使也因是而知之故死
間為誑事可使告敵因是而知之故生間可使如期五
間之事主必知之知之必在於反間故反間不可不厚
也昔殷之興也伊摯在夏周之興也呂牙在殷故明君
賢將能以上智為間者必成大功此兵之要三軍所恃
而動也

用間

蘇洵

孫武既言五間則又有曰商之興也伊摯在夏周之興

也呂牙在商故明君賢將能以上智為間者必成大功
此兵之要三軍所恃而動也按書伊尹適夏醜夏歸亳
史太公嘗事紂去之歸周所謂在夏在商誠矣然以為
間何也湯文王固使人問夏商耶伊尹固與人為間耶
桀紂固待間而後可伐耶是雖甚庸亦知不然矣然則
吾意天下存亡寄於一人伊尹之在夏也湯必曰桀雖
暴一旦用伊尹則民心復安吾何病焉及其歸亳也湯
必曰桀得伊尹不能用必亡矣吾不可以安視民病遂

與天下共亡之呂牙之在商也文王必曰紂雖虐一旦
用呂牙則天祿必復吾何憂焉及其歸周也文王必曰
紂得呂牙不能用必亡矣吾不可以久遏天命遂命武
王與天下共亡之然則夏商之存亡待伊呂用否而決
今夫問將之賢者必曰能遂知敵國之勝敗問其所以
知之之道必曰不愛千金故能使人為之出萬死以間
敵國或曰能因敵國之使而探其陰計嗚呼其亦勞矣
伊呂一歸而夏商之國為決亡使湯武無用間之名與

用間之勞而得用間之實此非上智其誰能之夫兵雖
詭道而本於正者終亦必勝今五間之用其歸於詐成
則為利敗則為禍且與人為詐人亦將且詐我故能以
間勝者亦或以間敗吾間不忠反為敵用一敗也不得
敵之實而得敵之所偽示者以為信二敗也受吾財而
不能得敵之陰計懼而以偽告我三敗也夫用心於正
一振而羣綱舉用心於詐百補而千穴敗智於此不足
恃也故五間者非明君賢將之所上明君賢將之所上

者上智之間也是以淮陰曲逆義不事楚而高祖擒籍
之計定左車周叔不用於趙魏而淮陰進兵之謀決鳴
呼是亦間也

文編卷二十六